

事該司可以聽理而紛紜啓達者勿啓云所謂啓達者雖與上言異矣然
訟事臨決若將不勝則必歸咎其司之堂上而上言者多矣如此等上言
亦皆受而啓之乎敢稟傳曰續錄所謂勿啓者蓋以成宗朝宗親宰

相以自已奴婢田地事及或相鬪之事詣賓廳紛紜啓達故立法也然
謂之啓達則其與上言異矣是非間政院受而啓之下該司則該司自
當處置矣政院何可阻當而擇其是非乎若庚寅年以後被罪請放上
言則可不受也其他宗親宰相及或凡人之上言則皆受而啓之可也

○憲府啓前事傳曰李藝事依允餘不見○日暈兩珥冠○癸卯憲府
啓前事不見○甲辰憲府啓前事不見○自四更至五更南方異方有
氣如火○乙巳憲府啓前事傳曰禹安國適差而新及第尹沈等推考
公事還入司也○傳于政院曰忠勳府堂上推考新及第棄之尹沈等

照律可也金瑞星

前爲刑曹匠即李世榮
殺入事照律時色郎

曾已罷矣其推考亦可棄也

以此言于司憲府○傳于政院曰各司奴婢斜付事非自今而始也自
祖宗朝成均館四學奉常寺奴婢外他各司奴婢皆得斜付也各色掌
及匠人自祖宗朝無有加減而其或斜付則各司提調爭其司之奴
婢紛紜來啓於政院使之一切勿啓則各申于仰曹直報政府而入啓